

a Concil. Toletan.
c. 6.

dici cœpit, Metropolim fuisse eiusque Episcopum Metropolitanæ munia in Prouincia Carpetania obuisse non renuo: sed & scio vix eius per vniuersam Hispaniam Primatum ab omnibus acceptum fuisse, vsque ad duodecimum Concilium Toletanum celebratum anno Christi sexcentesimo octogesimo primo, quo non tantum Metropolita Prouinciæ Carthaginensis confirmatus, verum etiam Primas totius Hispaniæ institutus fuit. Canonis sexti^a verba sunt. [Vnde placuit omnibus Pontificibus Hispaniæ, vt saluo priuilegio vniuscuiusque Prouinciæ, licitum maneat deinceps Toletano Pontifici, quoscumque regalis potestas elegerit, & iam dicti Toletani Episcopi iudicio dignos esse probauerit, in quibuscumque Prouincijs, in decedentium Sedibus præficere Præsules, & decedentibus Episcopis eligere successores: sic tamen vt quisquis fuerit ille ordinatus, post ordinationis suæ tempus infra trium mēsum spatium proprii Metropolitanæ præsentiam visurus accedat.] Ab eo tempore Toletanum Archiepiscopum nationalibus Hispaniæ Concilijs præfuisse certum est. Sed non multò post à tanta dignitate excidit, cum post tricesimum & tertium annum ab hoc Concilio regnum Gothicum euersum fuerit, totaque Hispania, paucis montanis regionibus exceptis, Sarracenorum imperio subiecta per trecentos sexaginta & octo annos. Sed de his, cum Notitiæ nostræ limites excedant, alij. Iam quæ sub vnaquaque Metropoli sedes Episcopales antiquæ reperiuntur dicamus. Eas autem omnes, quæ per sex Ecclesiæ prima sæcula fuisse leguntur, licet non semper eodem tempore extiterint, referemus: maxime cum hac in Notitia cognitionem Episcopatum qui per illa fuerunt, inquiramus.

NOTITIA ANTIQVA EPISCOPATVVM HISPANIÆ. PROVINCIA CARTHAGINENSIS.

TOLETVM Ptolemæo lib. 2. cap. 6. vulgò *Toledo*. Ex eius Episcopis *Melanthius* subscripsit Concilio Eliberitano, & *Euphemius* Toletano tertio.

CARTHAGO Ptol. ibid. vulgò *Carthagera*. *Hector* Episcopus Carthaginensis Metropolis subscripsit Concilio Tarraconensi, tempore Hormisdæ Papæ.

COMPLVTVM Ptol. ibid. vulgò *Alcala de Henares*. *Presidius* Complutensis Episcopus subscripsit Concilio Toletano sub Gundemaro, & *Hilarius* Toletano quarto.

OXOMA Ptol. ibid. alijs *Vxama*, vulgò *Osma*. *Ioannes* eius ciuitatis Episcopus subscripsit Concilio Toletano sub Reccaredo, necnon *Gregorius* Toletano sub Gundemaro.

PALLENTIA Ptol. ibid. vulgò *Palencia*. *Tonantius* vel *Conantius* huius sedis Antistes subscripsit Concilio Toletano III. & Toletano sub Gundemaro.